

四庫全書

集部

欽定四庫全書

集部

少室山房集卷一至四

詳校官編修臣翟槐

侍讀臣孫球覆勘

總校官庶吉士臣何思鈞

校對官中書臣王鍾泰

謄錄舉人臣劉禮

欽定四庫全書

集部六

少室山房集

別集類五

明

提要

臣等謹案少室山房集一百二十卷明胡應麟撰應麟字元瑞更字明瑞蘭溪人萬厯丙子舉人嘗與李攀龍王世貞輩游其所作詩數類皆附合世貞藝苑卮言後之詆七子者遂并應麟而斥之然其詩文筆力鴻鬯又佐

以雄博之才亦頗縱橫變化而不盡為風氣所囿當嘉隆之季學者惟以模仿剽竊為事而空疎舛陋皆所不免應麟獨能根柢羣籍發為文章雖頗傷冗雜而記誦淹博實亦一時之翹楚矣是編前有王世貞所撰石羊生傳稱應麟有寓燕還越計偕巖栖臥游抱勝三洞兩都蘭陰畸園諸集凡二十餘卷朱彝尊明詩綜內別載邯鄲華陽養疴婁江白榆

湖上青霞等集而無三洞畸園之名蓋應麟  
在日諸集皆隨作隨刻別本單行世貞彙尊  
各據所見故名有異同此集為萬厯戊午歛  
人江湛然通判金華時所刊乃其合編之本  
也乾隆四十三年五月恭校上

總纂官臣紀昀臣陸錫熊臣孫士毅

總校官臣陸費墀

金匱要略

提要

少室山房集原序

明興以帖括俳偶之文籠士士不復知有古文詞正嘉  
以來搢紳先生始名古學蓋濫觴於北地而婁江新都  
始暢其流焉當二子角峙海內如唐昌黎柳州士闖其  
闕涉其階墀即可以傲睨當世況其服膺避席而不敢  
與齒於當世又何如哉蘭溪胡明端以殆庶之姿策勲  
竹素於文無不工而尤工於韻語自漢魏流開元大厯  
以還皆字摹句擬如循枝攬葉以探厥本根意得之餘

泯然與之合轍其致辯成都鯁鯁不倦余季幼清以為  
忠告其然乎又何恠當世方聞博雅之士聞聲而色飛  
望景響而股弁矣嘗一登婁江之堂婁江曰吾不能諱  
獻吉昌穀輩之耻也融而超之于鱗庶幾焉後我而作  
其在此子矣交新都新都曰成都博而不核也江左核  
而未精博而核核而精宜莫如明瑞夫濟南之秀句婁  
江之東野也江左之賅練新都之退之也若曰吾終身  
所服膺在是餘子錄錄不復置齒牙矣一旦得明瑞而

遽躋之二君之上此寧可虛詞浮說相假借哉苞橘之  
富位置之高騁鶩之弘放誠有以服其心折其喙如尹  
望邢而泣季咸見壺子而却走固不自知其如此也夫  
當明瑞罷公車脫塵鞅高卧蓉山靈洞之間目視雲漢  
非其人即貴倨弗友傲然以千古自命莊生有云談二  
子於戴晉人之前猶一呖也豈不然哉昔喻君邦相尹  
蘭江慕交明瑞相從於山顛水涯唱詠連日夕余心實  
向往之適視瑒茲土而明瑞已騎雲煙去我而游寥廓

勵購其遺文讀之而板復漶漫紛錯因以公事之餘稍為銓次又得蘭溪令君盧爾騰以襄其役鴻臚趙君文鎮以董其成孝廉徐伯陽章無逸輩以校其似皆閱覽博物君子也卷計為詩八十文半之臚分部列犂然可觀矣余嘗讀弇山羊石生傳時明瑞年纔三十有八耳而所著詩已二十卷他所撰述計二十四種共為卷二百三十有三制作之富逾於古人後其年復不少也計所論著當有所散軼伏匿而不出者購成全書將在來

詰嗟乎蘭陰之間激水之上高門華閤上第元僚指不  
勝僂矣其間道德功業昭垂於日月者殊不乏人而明  
瑞裹敝憤弄三寸柔翰直與爭不朽於穹壤天嗇之於  
彼而昌之此於世正得失半也乃世或為明瑞扼腕一  
第夫唐以詩賦取士猶失之李杜況夫俳偶帖括之習  
又烏足籠吾明瑞哉史氏傳文苑要當置是子婁江新  
都間耳萬曆戊午中秋日新安江湛然書于金華郡齋

--	--	--	--	--	--	--	--

少室山房集

石羊生傳

王世貞

胡元瑞者名應麟一字明瑞嘗自號少室山人已慕其鄉人皇初平叱石成羊事更號曰石羊生人亦曰元瑞殆非人間人也仙而謫者也遂呼之石羊生元瑞父曰按察公僖母宋宜人按察公為行絕類萬石君而文藻過之所至好行陰德名位不甚稱以雲南按察副使歸今尚壯無恙元瑞為兒時肌體玉雪眉目郎秀五歲按

察公口授之書輒成誦見客客使屬對輒工九齡從里社師日佔俾習經生業而心厭之俄恙祛按察公篋得古文尚書周易國風雅頌檀弓左氏莊列屈原兩司馬杜甫諸家言讀之按察公竒其意弗禁也稍長遂能為歌詩藉藉傳里中而于經生業亦不廢十五補博士弟子員非其好也會按察公拜尚書禮部郎挾與俱渡錢塘過吳閭汎楊子北歷齊魯趙魏之墟至燕市而止所經繇吊古即事往往於詩歌發之而是時南海黎惟敬

歐楨伯吳郡周公瑕吳興徐子與嘉禾戚希仲沈純父  
永嘉康裕卿先後抵燕發元瑞藏詩覽之咸嘖嘖折行  
請交至於琳宮梵宇高會雅集元瑞以齒坐末坐片語  
一出無不恍然披靡自失也曰使用昔賢隸事奪席例  
吾曹無坐所矣臨淮小侯李惟寅慕元瑞甚使容簞而  
致之為上賓旬日不聽出惟寅用是亦以詩名而周宗  
正灌甫雅自負風雅有人倫之鑒貽元瑞三十韻首以  
北地信陽相屬元瑞益自信尋以按察公外除元瑞歸

從母里中母患頭風甚劇元瑞委身醫藥間日夜扶持  
不休母頭風良愈而身過勞得清羸疾矣因跳匿金華  
山中而會大司空萬安朱公衡還過蘭谿朱公故從燕  
見元瑞詩而驚賞者至是發使山中蹤跡得元瑞以書  
要之而泊舟待三日元瑞感其意為長歌七百言以贈  
朱公公袖示督學使者滕君伯輪曰天下奇才也滕君  
輒超格檄受餼學宮且趣入試兩御史再試再為諸生  
千人寇已薦鄉書上公車報罷元瑞意殊不在一第其

所游從皆天下賢豪長者然所當心獨余兄弟與李觀  
察于鱗汪司馬伯玉吳叅政明卿會于鱗死餘皆散處  
不相及久之意邑邑不自得而余弟敬美與觀察公同  
年過蘭谿謂觀察吾欲就阿戎談當勝卿遂即元瑞劇  
語一夕皆申旦臨別眷眷不忍釋曰吾於詩獨畏于鱗  
耳已矣今庶幾得足下又曰幸與家中丞同世胡不一  
及門即卒然抱于鱗恨若何時余方謝客曇陽觀聞元  
瑞來喜不自勝力疾啟闕與為十日飲間出所著少室

山房詩余得而序焉所以屬元瑞甚重而用是頗有斷  
斷者余二人俱弗顧元瑞乃高卧山中不復就公車而  
蘭谿令喻邦相豪於詩與元瑞意合忘形爾汝嘗偕過  
趙學士山房倡和連日夕元瑞之卧山中凡六載而始  
上公車至都下遇張觀察助甫助甫余兄弟友也讀元  
瑞詩擊節曰二十年止此調矣元瑞亦竒助父詩契密  
無間且各自悵相遇晚試復罷歸時大司馬張公肖甫  
靖浙難過元瑞里元瑞避弗見張公謂按察公公兒佳

甚故知之今難我得非以使者惠文嶽嶽耶為我致之  
錢塘請得具賓主禮元瑞乃強為錢塘謁張公果以上  
客客之會伯玉來湖上大將軍戚元敬系至伯玉數與  
元瑞相聞問把臂劇驩出元敬七絕句詫之曰大將軍  
健兒也乃能作文語不下沈太尉曹竟陵生亦能賦贈  
我乎元瑞援筆千餘言立就竒思滾滾既大將軍集相  
向嘆賞不置伯玉因曰我欲之海上訪王元美兄弟生  
復能從我乎元瑞曰吾心也遂同過弇州園伯玉道為

少室山房集序其重不下余時偕元瑞至者伯玉弟仲淹仲嘉而張大司馬亦以內名跡伯玉而來尋先別去余兄弟與伯玉元瑞諸君積日游弇中甚樂也元瑞性孤介時時苦吟沉思不甚與客相當至其揮麈尾拈藝文持論侃然尤慎于許可有莫生者躁而貪以品不登上中側目元瑞甚屬伯玉元敬游西湖故遍置坐客為開端元瑞夷然弗屑也及在弇仲淹被酒狎元瑞元瑞拒弗受客謂元瑞曩湖上之役胡以異茲元瑞徐曰莫

生者庸詎足校也仲淹司馬公介弟吾儕當愛之以德  
獨奈何成人過耶容乃服元瑞自髻髻厭薄榮利餘子  
女玉帛聲色狗馬服玩諸好一切泊然而獨其嗜書籍  
自天性身先後所購經史子集四萬餘卷手鈔集錄幾  
十之三分別部類大都如劉氏七畧而加詳密築室三  
楹貯之黎惟敬大書其楹曰二酉山房而屬予為記旦  
夕坐卧其間意翛如也恒自笑蠹魚去人意不遠又謂  
我故識古人恨古人乃不識我其托尚如此好稱說前

輦風節嘗怪其郡若梁劉孝標之介唐駱賓王之忠而  
世僅僅以文士目之當由作史者盲於心故且史第知  
有狄梁公宋廣平賢皆顛首而從周裸將以視賓王何  
徑庭也上之采風使者蘇君禹君禹雅敬信元瑞趣下  
其事賓王得以鄉賢祀郡城而孝標亦暴顯元瑞所著  
詩有寓燕還越計偕巖棲卧游抱膝三洞兩都蘭陰畸  
園等集二十餘卷詩藪內編外編十二卷他撰述未行  
世者有六經疑義二卷諸子折衷四卷史藪十卷筆叢

十卷皇明詩統三十卷皇明律範十二卷古樂府二卷  
古韻考一卷二酉山房書目六卷交游紀畧二卷堯玄  
國志十卷酉陽續俎十卷隆萬新聞二卷隆萬襟聞四  
卷駱侍御忠孝辨一卷補劉氏山棲志十二卷蒐輯諸  
書有羣祖心印十卷方外遐音十卷考槃集十卷談劍  
編二卷采真游二卷會心語二卷類萃諸書有經籍會  
通四十卷圖書博攷十二卷諸子彙編六十卷虞初統  
集五百卷蓋生平於筆硯未嘗斯須廢去元瑞壯未有

子邇始舉二子戊子冬復以按察公命赴公車至瓜洲而病病積久不愈慨然曰吾其殆乎謂余知應麟者唯子幸及吾之身而傳我使我有後世後世有我也王子曰元瑞年三十有八耳神清而意甚舒即偶犯霜露何恙不已而慮至此也夫以元瑞之生僅三十年而著作充斥乃爾過此以往所就當又何如耶元瑞於他文無所不工績學稱是顧不以自多而所沾沾獨詩彼固有所深造也元瑞才高而氣雄其詩鴻壘瓌麗迴絕無前

稍假以年將與日而化矣至勒成一家之言若所謂詩  
藪者則不啻遷史之上下千載而周密無漏勝之其刻  
精則董狐氏韓非子也吾長於元瑞二紀餘姑為傳以  
慰之且謂元瑞子後當竟傳我



欽定四庫全書

少室山房集卷一

明 胡應麟 撰

樂府十八首

擬大明鏡歌曲十八首

有序

夫鼓吹鏡歌之作聲自有熊所以象成功昭盛美  
凡聖王受天明命推陷廓清之烈非此亡以被諸  
聲容粵自商周以征伐定天下一時播告之章勿

可觀已漢鏡歌十八曲其辭迄今尚存雖文義譌  
脫難以盡諧歌中之辭亦匪專為武功而設至味  
其音節隱然發揚蹈厲之風視漢諸古詩優柔馴  
厚者迴絕不倫則鏡歌所由作可知已兩漢而下  
魏繆襲吳韋昭晉傅玄宋何承天唐柳宗元代相  
擬襲趙宋無聞則皇明宋濂氏嘗追述之尋諸家  
制作即風格詞藻未能抵掌西京一時可頌之績  
固咸取以被諸樂章矣高皇帝提三尺起淮甸掃

邊塵而遏絕之大荒之外此其勲德巍巍論湯  
武即軒轅氏不無遜心獨鏡歌之作諸文章家往  
往缺焉間一二僅見而辭義寂寥音節迂緩未足  
以揄揚大造垂示無窮夫魏吳偏閏唐宋下哀繆  
韋何傳於騷壇未槩作者彼且黽勉步趨以自侈  
一時殊際焉明臣子目擊高皇帝震古無前之偉  
樹以安享二百禩之太平即草莽山林疇匪帝力  
而默默終身不能效一辭之贊甚非所以效康衢

擊壤野老細人之義也應麟不敏呻吟佔畢餘二  
十年蠡海管天頗測毫末謹按我聖祖發軔之初  
以迄於四方底定之日敘次其事為大明鏡歌曲  
一十八章誠知謏聞譎識上不足以鳴昭代之鴻  
庥下不足以驚西京之遐軌以較唐宋諸家庶幾  
近之綴屬既成不忍焚擲爰錄笥中附諸康衢擊  
壤之末異時鴻生碩彥製作迭興盛演歌辭登諸  
鼓吹俾聖神勲德永揭千秋此或為之嚆矢云爾

鏡歌本二十二曲其四曲亡魏吳所擬僅十二曲  
說者咸以十曲仍用舊名然其辭亦不復傳何也  
今止據存者十八曲擬之考諸家詞惟繆韋傳常  
被施用承天宗元輩率私作之以備異時采擇者  
而憑依名義流播迄今故敢竊取其例焉

### 黃河清

元至正末黃河清大聖啓運協符載闢宇宙為黃

### 河清第一

黃河清聖人出應昌期誕至德著戎衣奮三尺靖四方建都  
邑干戈偃弧矢戢統九有主社稷神與鬼咸受職烽烟掃爨  
火熄維大明照中國萬千禩與天一

右黃河清二十句句三字

鳳之翔

高皇帝起濠上追王迹肇今名為鳳之翔第二

鳳之翔在濠梁義師起帝網張二十四將驅天狼兵鋒  
所指定四方薄海內外以莫不來王威加六合返舊疆

徵歌悉發諸兒郎復彼人民世世無有所與為我沐與  
湯擊筑大風雲飛揚千秋萬歲樂未央

右鳳之翔十一句四句三字六句七字一句  
九字一句十五字

攬羣雄

龍飛淮甸豪傑景從得大將達遇春等二十  
四人以一海內為攬羣雄第三

攬羣雄盜如蝟大聖握符起淮汭與神為謀蓄鋒銳提

三尺劍驅海內驅海內攬羣雄真人出天下同四方六  
合咸景從如風從虎雲從龍汛掃大漠如飛蓬扶桑曠  
曠朝日紅驅海內攬羣雄

右攬羣雄十五句八句三字七句七字

克建業

師濟采石長驅金陵定皇畿繫萬國為克建

業第四

克建業定皇畿皇畿定舉義旗天兵百萬任所之東吳

南漢西蜀七閩六詔從風靡天下大定一戎衣

右克建業六句四句三字二句七字一句十

三字

婺歸德

大駕東征首下寧越婺女之郊聖蹕駐馬為

婺歸德第五

天兵十萬下東國婺以先寧駐皇蹕景星熒熒耀城邑  
我戰則勝攻則克四海從風靡弗一勢如破竹烽燧息

天命曷歸歸有德

右發歸德七句句七字

四友

兵入浙聘劉基宋濂等四人置帷幄中為四

友第六

於維文王是親四友疏附後先以翼元首哉哉高蹤異  
代曷有天威是臨匍匐奔走猗與聖祖廣延羣雄如天  
如海為萬物宗王師所向六合景從爰率車徒以定浙

東浙東底平大統未集蚤作暮思思布文德曰基曰濂  
曰琛曰溢玄纁奕奕交布東國曰四先生論道經邦坐  
而弗名匡朕弗遑嗚呼盛節慶流無疆德六五帝功百  
三王

右四友三十二句句四字

戰鄱陽

偽漢陳友諒率徒數十萬來抗高皇帝躬督  
大將達遇春等鏖戰湖口滅之為戰鄱陽第

七

明日大戰鄱陽簡師料徒百萬強烈風吹沙湖水揚  
煙焰漲天焚大航三十六將死康郎再戰湖口殲餘皇  
我舟膠沙敵尚強疾呼奮臂來衝撞鯨鯢蔽空雲日黃  
拍江巨浪何茫茫如血鉅鹿尸昆陽維天命我明車輪  
碎螳螂百矢定邊背若芒一矢貫睛諒死亡諒死亡理  
出降威加四海莫不來王

右戰鄱陽十九句二句三字二句四字二句

五字十三句七字

盤門入

張士誠據姑蘇命將覆其巢兵不血刃為盤  
門入第八

盤門入士誠泣前歌後舞大師集兵不血刃下城邑誰  
其帥者公魏國歸市弗止塵弗易萬姓懽呼頌皇德二  
敵既殲皇之土東極滄溟南亘楚長驅入中原孰敢余  
阻

右盤門八十句二句三字七句七字一句九  
字

降谷珍

島夷首亂元末懾我大威束縛待命海口為  
降谷珍第九

方谷珍起盜藪乘元之亂竊據一方地如斗耗金幣大  
官酒海上時時飛且走如鬼如蜮雞與狗大明當空燭  
九有舉宗乞命竄海口帝憫其愚印加肘以較羣雄最

小醜

右降谷珍十一句四句三字六句七字一句

十一字

七閩

陳友定保閩粵師縛之為七閩第十

七閩保岩阻連亘皆山梁友定據其巢負固如金湯我  
皇命將諭諭以開茅疆自謂故元臣負義不肯降王師  
十萬下戈船逐長江兵入如破竹如虎吞羣羊委身繫

金少四庫全書  
卷一  
尺組支體磔分張自謂故元臣守節甘喪亡大都以淪  
覆誰為招國殤

右七閩十八句句五字

維中國

大將統六師北鄉儒臣濂諭檄中土華夏擴  
清為維中國第十一

維中國帝王所自立櫬槍遍郊原天地黯無色天重開  
地重闢扶桑熒熒日月出照八荒爛九域芟夷禍難四

海一神龍夾助正統集帝愍邊塵擾中國詔下大將軍  
達副將軍過春提兵九十六萬戈鋌甲冑如浮雲命詞  
臣濂草檄諭彼中華民長驅入河洛壺漿箠食來成羣  
右維中國十六句五句三字三句五字四句  
七字二句十一字一句十二字一句十三字  
大都走

天兵入大都故元主棄社稷奔為大都走

第十二

元都平四海清神鬼受職萬方庭列大藩置神京汛掃  
烽烟混一區寓再造華夏開文明

右大都走六句四句三字一句七字一句十  
五字

庫庫

元規復故都師擣之大戰於定西古城夷其  
部落王保保絕塞遁為庫庫第十三

察罕起元末舉代推鷹揚天命去勝國剗刃爭戰場維

庫庫察罕子復良下益都伐洮陽驅兵出沒觀以望帝  
三諭彌陸梁執囚我行人怒臂如螳螂命大將統武驍  
北征隴右一戰搗其巢搗其巢萬騎突至如風颭賴傅  
穎公却前茅兩軍就舍不得交夜分刳營足納一靴身  
騎騎馬逃騎馬逃絕大漠我軍四十萬勝負互相角巨  
網漏吞舟竟死蕃部落帝稱好男子維庫庫

右庫庫二十六句七句三字十句五字一句

六字四句七字二句八字一句九字一句十

三字

昇面縛

蜀阻聲教璟諭不從大兵入成都虜明氏母  
子歸為昇面縛第十四

昇面縛出成都母子啞啞啼路途父旻玉珍一目枯貪  
饕亂亡起雄圖不久身殉留遺孤大明區寓至化敷屢  
使遣諭如追逋獷兵悍將驕相扶驕相扶守瞿塘帝命  
潁國公東甌王伐山通道開戰場直搗階文潰腹心腹

心潰肝膽亡母子輿櫬大道旁昇也肉袒仍牽羊侯以  
歸義戒殺降高皇帝德洪虞唐唐高宋武如豺狼

右昇面縛二十一句六句三字十四句七字一  
句八字

北征

中夏略平分命諸上將耀兵沙漠朔庭一空  
為北征第十五

明受命海宇一前元餘屬負固北庭保其宅團結黨類

以俟我釁隙為我子孫憑皇帝遐思勿姑息乃眷西顧  
以北征桓桓大將統兵億萬犁其庭犁其庭心膽落單  
于遁絕大漠

右北征十一句六句三字二句七字二句十  
一字一句十四字

納噶楚

宋國公出塞倂降元將悉收其衆二十萬餘  
人為納噶楚第十六

納噶楚居金山二十餘萬衆虎視一何眈眈帝命工公  
馮統兵出全燕天威所震懾敵騎不敢馳敵弓不敢彎  
二十餘萬衆一時赴長安擬金伐鼓壯士懽築三受降  
玉門關

右納噶楚十三句二句三字八句五字一句  
六字二句七字

六詔

元孽負固滇中命沐英等督兵平之永鎮其

地為六詔第十七

六詔天西南惟滇號最鉅殘元歷數盡遺孽猶虎踞帝  
愍絕塞民使命馳風塵彼昏不奉詔虔劉我信臣皇赫  
斯怒命黔寧勝艘巨舶浮昆明昆明水涸殲長鯨碧雞  
金馬入我版圖四海平

右六詔十二句八句五字三句七字一句十  
一字

受天命

四方底平九域以寧百千萬禩統我皇明為

受天命第十八

受天命定四方干戈偃鉞藏軼大武駕成湯媿軒轅  
儷虞唐擴地萬里居中央整齊萬國開明堂漢唐宋晉  
隋諸邦絜功比德如蝸蟾萬八千歲永無疆

右受天命十三句八句三字五句七字

少室山房集卷一

欽定四庫全書

少室山房集卷二

明 胡應麟 撰

樂府三十首

漢鏡歌十八首

朱鷺

朱鷺下漢道昌一雙羽翮雲中合沓而飛翔合沓而飛  
翔在我庭戶以建華鼓導大輅魚魚雅雅詫彼行路朝

食沆瀣夜濯風以露應期出世所慕五帝三皇巍巍福  
我祚

艾如張

艾如張張四維擊高鉦懸大旗戈鋌甲冑光陸離千靈  
從七校移虞人雜沓冠以皮臂蒼走黃當路岐南山有  
虎豹北山鹿麋狐兔若丘山縮足不敢馳我欲上天天  
門九重我欲入淵血肉餽蛟魚龍王者合三驅百獸一  
一歸我樊籠不見青冥冥冥者鴻聳六翮乘長風遊赤

霄入無窮雖有增繳羅網將安庸

思悲翁

思悲翁氣結不能言兒長翁為娶婦思得奉晨昏白頭  
以團樂婦惡如豺狼入門作災患北翼鳴前庭舉室愴  
以煩知交各各縮舌親戚斷往還我有壺漿翁饑不得  
食我有裳衣翁體不得完思悲翁氣結不能言我欲訴  
上帝天門九重入以難我欲訴司命司命徘徊以盤桓  
念欲以高飛無羽翰以負翁去體毛何摧殘不若城上

烏反哺翁殘年思悲翁氣結不能言安得天雨電霹靂  
震長夏雷霆半空下永永戒來者

翁離

舊辭缺今  
據補之

翁離趾中可築室何用葺之桂若蘭翁離趾中可築宮  
何用塗之椒以檀修竹夾廣除一何檀欒千乘萬騎續  
紛哉往以還左長楊右甘泉汾陰後泰時前黃鵠高飛  
極雲天詞臣獻賦陛下之壽三千年

上之回

上之回祀甘泉金支颺翠旒旋雨師後風伯前鼓鐘管  
吹聲何填駢東達扶桑南逮于闐西逕流沙北訖祈連  
天出景星地產醴泉報慶成致精虔肅雍哉愴以嚴五  
帝三皇享億萬斯年

戰城南

戰城南日無色壯士長征死願作烏鳶食請謂烏與鳶  
壯士死國家委身喪其元汝食其肉一胡忍且殘世有  
大豪元惡巨奸殺公吏探赤丸暴戾恣睢膾人肝一旦

金  
卷二  
禍機發橫尸道旁血如流泉腐肉如丘山汝胡不食甘  
此忍且殘請為烏與鳶答君子言世有大豪元惡巨奸  
司命不敢錄司敗不敢拘司隸不敢糾彈十九老死牖  
下子孫貴盛冢墓象祈連彼雖有肉血我安得食壯士  
不自惜委身徇國家喪其元我固當得食彼復何言

巫山高

巫山高高望不可極日月蔽虧雲雨出入有美一人曰  
維神女朝為行雲暮為行雨冷然入余夢貽我以翠羽

鬱陶乎余心將以疇語將舍余國都以往從女朝朝暮暮為雲為雨

上陵

上陵一何崔嵬宮殿若雲屯觀者為徘徊門有車馬客  
駕言上陵迴千乘萬騎宵行烈風雷我欲遐征憩望金  
銀臺封泰山禪梁父登日觀觀蓬萊蓬萊東見朝旭芝  
草藪生醴泉滿谷七十二家著編錄

將進酒

卷二  
將進酒乘乘黃列鼓吹鳴笙簧齊姜楚姬列兩傍衛女  
秦娥左右以成行挾安陵戲龍陽擁長劍珮琳瑯續哉  
紛盈高堂烹大瓊炙肥羊五音和八珍良天瓢甘露臣  
以嘗千秋百歲逍遙以徜徉

有所思

有所思思美人美人渺何許大海天東南曷不往從彼  
游路途險且艱弱水不容舟三山鬱嶺岼宮闕冠巨鰲  
遙遙極青天美人在其上三山高以寒我為釣巨鰲截

竹為長竿持竿坐滄海大水何漫漫巨鰲牽不動但見  
一雙鯉魚遙墮青雲端呼童剖此鯉中有美人尺素翰  
前有長相思後有勸加餐徘徊感此意躑躅不能言

雉子斑

雉子斑雉子斑一雄一雌抱子田野邊雄飛摩天去不  
還孤雌養雛寄草間養雛寄草間乳哺一何艱夜不遑  
寢晝不及食毛羽既長成五色麗且鮮一鳴舉世驚一  
飛上沖天回頭顧視我母六翮何闊珊老病條已至慊

慨向重淵有子不得養慟哭推心肝有子不得養慟哭  
摧心肝

君馬黃

君馬黃臣馬蒼飛軒蹠躐大道旁旁人顧見臣馬以莫  
不謂良一朝中涓下明堂君馬入天閑意氣何揚揚臣  
馬老伏櫪伶俜瘦骨朝逐水草暮逐斜陽背負鹽車以  
西上太行路逢伯樂造父王良停車振策為我彷徨念  
欲剪拂我以登明堂嗟筋力已盡莫能騰驤長鳴短號

斷絕中腸

芳樹

芳樹芳樹揚春華結秋實東風歷亂而飛揚容色在朝  
夕美人坐高堂兀兀愁蛾眉君心為他人冶豔能幾時  
春華詎能久秋實那可期普天之下悠悠疇非輕薄兒  
班姬與陳后解事一何遲黃金買詞賦徒為世主疑不  
見芳樹枝榮瘁各有時端居任大化何用戚戚顰蛾眉

聖人出

聖人出明光宮萬乘千騎升回中望祀天地禋於六宗  
百神來享以莫不肅雍肅肅雍雍四方同風唐虞之世  
比屋皆可封浩浩大化與天地無終

上邪

上邪我與君輸肝委膈他人那得聞急難各相護救決  
絕妻子如浮雲中心耿耿金石百年以為鄰巢由撫六  
合堯舜下閩闔山崩石爛河枯海水竭十日竝出天地  
裂我與君好永不絕

臨高臺

臨高臺望長安飛甍畫棟嵯峨峭崿而嶭岼蒼龍九旒  
限重闕我欲謁天闈一覲上帝顏手持長生藥以奉心  
所懼上帝肯聽臣億萬千斯年蒼龍九旒限重闕限重  
闕使我欲進心茫然臨高臺望長安撫膺三嘆行路難

遠如期

遠如期遊四方北碣石南瀟湘西太華東扶桑鑿混沌  
竅燕中央飲則食兮樂而康以尋列仙拾金光飛翔八

極行七襄馳驅絕冥觀大荒千秋萬禩壽未央男兒墮  
地桑弧蓬矢射四方安得老死一丘局促若棘下駒守  
故鄉

石流

石流南山有石北澗有流石何齒齒流何湯湯石以枕  
我流以漱我腸幽蘭哉夾岸芬以芳芬以芳順風揚彼  
美人兮天一方安得寄此永永長相望

補蜀漢鏡歌十二首

有序

炎精既缺海寓三分昭烈以漢室宗親親任武鄉  
君臣一德託孤寄命比隆伊周自兩漢以還大統  
故當以蜀為正王通氏抗言武鄉不死禮樂可興  
識者咸謂不誣顧漢氏而下魏吳晉各有鏡歌以  
播揚功德蜀反缺焉蓋武鄉身任復漢之責魏吳  
未滅夙夜皇皇惟誓師鞠旅東鄉是圖舍是而播  
告聲歌彰明得意此天下既平之事非枕戈待旦  
之日所暇為也又蜀之文人時尤不競譙周邵正

等輩槩之詞賦咸匪所長亡論武鄉未暇即欲有事焉未有可以肩草創之能洪潤色之寄者也惟是魏吳製作流傳迄今才流藝士簧鼓筆端動以昭烈武鄉夷諸僭竊順逆邪正鬱而勿彰余甚憾之昔陳壽三國帝魏先晉紫陽一正其謬稱快千秋不佞佔畢詞場餘二十載于樂府雜調頗覩一斑每讀鼓吹鏡歌至繆襲韋昭傅玄諸作不勝搔腕至欲鼓而攻之噫彼各自尊其主勢則宜然百

世之後是非大明而操管握觚之儔從事樂府惟  
齊梁月露冶豔相沿迄未能一厝意於此余則何  
敢以謙讓未遑也爰效繆韋諸體為蜀漢鏡歌曲

一十二章上以著昭烈間關戡定之績下以明武  
鄉夾輔盡瘁之忠即藻繪方之諸家未當魯衛而  
理直義形據事陳詞羣嗥自廢忠臣志士之憤或

賴此其一雪矣夫

宋無鏡歌宋景濂嘗追  
補之惟後漢獨缺云

帝車見

昭烈甫髻舍東南產竒樹五丈餘童童若羽蓋望  
氣者咸屬心焉為帝車見第一

帝車見涿鹿墟童童立五丈餘千靈衛七聖趨颺金支翼翠  
旗雨師道風伯驅氣如龍殷里閭真人起握斗樞奠漢鼎撫  
皇輿炎精曜火德噓億萬載帝方隅

顧隆中

先主屯新野三顧諸葛亮於隆中明良之盛復絕  
千古為顧隆中第二

顧隆中一顧再顧三顧何從容千秋載觀明揚風君臣契合  
魚水同莘野幣交湯匪躬渭川一見羅非熊何如三顧勤隆  
中惜哉炎燼噓殘虹創業未半中道終三分鼎足寧稱雄

克老瞞

曹操取荆師百萬而東先主命諸葛亮諭權發兵  
大破操於赤壁為克老瞞第三

克老瞞厥功不可量瞞挾天子令四方以暴如虎貪如  
狼既定荊州下長江併兵八十三萬強先威所指橫以

張所觸者碎當者亡遣軍師亮諭孫權權奉命發兵助  
我屯江干桓桓烈炬戰艦轟將士大呼衝敵堅賊兵百  
萬屍如山操走烏林四海安

權進妹

既破操屯荆權懼大威詭媒締好為權進妹  
第四

權進妹託同仇外戚內疎諧孫劉包藏禍心蓄愆尤牀  
帷甲第圖淹留戈鋌矛戟紛相求帝握大機與神游與

神游衆叵測劉郎懽孫郎泣周郎昏乾口燥呼不得以  
頭搶地長太息千秋齒冷笑吳國

史稱瑜今權離間關  
張等臨歿復以為言

云

### 定兩川

成都底定遂圖漢中馘淵驅郤魏操鼠奔爰  
建大號即帝位為定兩川第五

定兩川皇圖赫赫帝業安成都破竹萬姓懽壺漿夾道  
食以簞西指定軍奪前山夏侯來爭馘斬淵馘斬淵衆

大崩卻也棄馬亡心魂操懾首鼠抱頭奔抱頭奔兩川  
一順天應人即皇帝位新萬國

討漢賊

關侯破襄圍樊風動華夏操震怖欲奔權帥賊  
黨蒙遜襲荊州漢事遂壞先主親征權軍於  
猇亭為討漢賊第六

討漢賊屯猇亭屯猇亭皇赫斯怒以親征嗟關侯率眾  
圍樊城七軍夜渰師徒崩操懾大威如雷霆賊權惴惴

怖且驚怖且驚謀呂蒙逞虐焰乘奸兇為鬼為蜮蠖與  
蠛遂亡荊州喪大功踰月蒙死屍流蟲皇赫斯怒離巴  
中離巴中以親征破柘歸震夷陵蒙賊既死遜賊復興  
嗟嗟昊穹漢事壞垂成

渡瀘

丞相亮受遺輔政五月渡瀘羣夷格心式歸  
大化為渡瀘第七

渡瀘師徒一何勞五月盛暑深入不毛託孤寄命予惟

伊咎陶勞實在予予曷敢逃五月盛暑深入不毛獲彼  
大酋以令羣豪七縱七擒俾返其巢衆懾天威永戴大  
朝振旅而還徒御弗號雍雍旆旌肅肅羽旄文德誕敷  
爰格有苗千秋兩階載覩唐堯

祁山

丞相亮將圖中原上表出師三郡響應魏人  
震恐舉國奔命為祁山第八

祁山出漢賊驚創業未半先帝崩丞相匪躬夜弗寧上

表帥師東鄉征卒徒十萬如風霆潛張箕谷為疑兵身  
率大衆屯街亭三郡響答如流星惜哉馬謖毀垂成毀  
垂成載出軍王雙梟郭淮遁拔武都陰平魏大震

馘張郃

司馬懿帥衆來攻命魏延等逆擊大破之馘  
其將張郃於陣魏人喪氣不復出為馘張郃  
第九

馘張郃在鹵城蜀人歡忻魏震驚魏兵百萬乘蜀營司

馬披甲仍先登我師一出殲長鯨卒徒賈勇懿大奔積  
甲三千若丘陵司馬匍匐亡旄旌賊徒郤追木門萬弩  
射郤褫郤魂馘之不異雞與豚桓桓八陣孰敢嬰所當  
者破擊者平如湯如武天下無敵十一征

蜀如虎

賊堅壁不戰使以巾幗遺之懿輦虜受馬魏  
衆咸曰公畏蜀如虎奈人笑何為蜀如虎第

十

蜀如虎師甚武熊羆十萬下天府仁義禮樂為盾櫓奸  
雄閉穴氣銷沮甘受巾幘呼老姥嗟嗟懿如鼠亮如龍  
蜀如虎

### 五丈原

師上五丈原畊者雜於渭濱三代節制之師  
至是再覩為五丈原第十一

五丈原駐三師三代以還僅覩茲濱渭雜畊軍無私芻  
糧百萬饒餘貲中原克復功須斯功須斯定關洛滅魏

斬叡梟懿殛權混一四海興禮樂

餘威懾

大星殞亮卒師魏衆來追我兵反旆擊之懿  
魄奪反走為餘威懾第十二

餘威懾走仲達胡天弗弔喪諸葛大星煌煌殞天末我  
師反旆喪不發魏人懼呼夜來躡鳴金展幟雷電掣懿  
也狼奔膽欲裂千秋壯士贊諸葛死諸葛走生仲達

少室山房集卷二

欽定四庫全書

少室山房集卷三

明 胡應麟 撰

樂府三十首

擬漢郊祀歌十九首

練時日

練時日候陰陽郊圓丘祀明堂君哉蒿薦上帝靈來思  
思弗替靈之駕六飛龍天門開誅九重靈之旗翼神魚

乘罡風載行廚靈之裳曳三光爛虹霓象玄黃靈之珮  
建蒼玉鏘太虛答窮谷靈之下赴閭闔洋洋如走六合  
靈之歆稷用登告特牲報維馨靈之留駐蒼虬紛萬舞  
結綢繆靈之往遺盼蠻儼若思企餘想奏咸池舞韶箭  
繽紛哉靈之樂臣八荒馭九夷歲千億靈之貽

帝臨

帝臨中央以運四方苞孕萬彙協和三光厥服載黃厥  
數載五克配上帝維我后土皇皇后土德周遍咸百穀

告成大有斯年

青陽

青陽載臨萬物敷榮勾萌甲坼蠢動含靈雷乃發聲雲  
行雨施大造之仁品彙華滋跂行喙息繫以疇息東皇  
太乙莫匪爾德

朱明

朱明熒熒品彙嘉悅鮮潔齊均以莫不達祝融司造薰  
風維時皇人法天南面象離萬物相見茂昭大夏昭告

昊穹百神來下

西顯

西顯金方蓐收是秉卉木變衰霜露淒緊既蒼既樵我  
稼我苗實穎告成碩彼東郊爰馨黍稷殷薦上帝于億  
千年永矢弗替

玄冥

玄冥水伯載司寒沍殞霜殺草昆蟲閉戶北風宵厲飛  
霰晝零木脫水涸雷蟄無聲歲運既徂陽和在候萬寶

既成敢告明后

維泰元

於維泰元象帝之先綱紀三才遍周八埏皇皇天地疇  
闔疇闢於維泰元潛運無極風雨雷露維日月星咸若  
其時克順克成胎卵濕化生育孳遂滅除灾兇增長福  
艾四序既宜八表既安孰司其柄於維泰元嘉牲燄燄  
陶匏涓潔聿來駿奔靈爽斯達以莫不虔以莫不馨元  
化綱緼泰階底平

天地

維天維地協尊竝巨嘏余一人六合和豫皇皇齋宮穆  
與神通臣隣景從肅肅雍雍報圜丘兮祀后土千童羅  
列謳且舞曳擊笙鏞鳴琳球神如有知儼來遊大小諸  
秩咸敬厥職整齊服章駿奔翼翼羣公秉德毋怠毋忽  
大君恭默式於列辟降天神兮下地祇朱雀為駕蒼龍  
旗勾陳前導屏翳馳長劔幼艾紛陸離流商刻羽歌咸  
池神颺擊轂河宿移蕭韶九成鳳來儀皇人萬壽登維

祺

日出入

日出入暘谷扶桑間一何迅且疾百年若電光四序如  
風飄祝融驅火輪蓐收乘斗杓羲和掣神鞭玄冥扇狂  
飈安得駕六龍遊遨遍八極長生不復死永永天地畢

天馬

天馬來自渥洼度月支逕流沙天馬來徠以蹠躩骨權奇  
汗維血天馬來驥為友喪驪黃牝與牡天馬來躡浮雲

日千里空而羣天馬來服帝閑從法駕鳴和鸞天馬來  
兆有德瑞萬方景四國

天門

天門開闢九重上帝居百靈從瑤為臺璇為室樞紫貝  
牖金碧吐望舒宅曜靈建雷鼓樹霓旌左蒼龍右白虎  
守飛廉衛玄武靈光被六合周燭萬景洞九幽勵精誠  
薦嘉藻永如期錫難老靈爛爛兮載揚光清飈激雲下  
羽旌牽牛織女行七襄蛾眉稚齒紛君堂靈目成兮悅

而康合祝啟兮陳笙簧天門呀然豁扶桑雙翼乘風朝  
紫皇揖西王母攜東方食蟠桃實乘乘黃周歷八紘度  
九域吐納真精戲無極

景星

景星見祠神鼎載出煌煌赤文以播有德經緯虹霓屈  
蟠蛟螭魑魅莫能逢之我鼎爰獲我號爰建以祀  
汾陰光我大漢巍巍夏后錫此寶勞閱歷商周肇見我  
郊啟告上穹肆逮下土作樂象成百獸率舞享帝享親

以莫弗歆甘露是凝昭我萬齡

后皇

后皇降休介我景福以玄以黃黼黻章服靡邇弗洽靡  
遠弗蒙億萬兆庶視此成功

齋房

齋房三秀柯葉九莖煜煜皇皇太和是蒸亭雲爛霞噓  
日月精句曲之天金液玉英羽駕罡風八翼上征春曲  
靈苗維王國禎於鑠我皇禊億萬徵

華燧燧

華燧燧黍載馨延庶旄駐翠旌神之來七聖俱虹為馬  
蜺為車神之來百靈萃風為裳水為佩神之來薦嘉豆  
八珍輻衆芳輶神之來肆長筵雷大鼓鳴鈞天何以休  
神之留赤鳳至黃麟游何以豫神將遇慶雲見甘雨澍  
躡鹿盧綦星辰佐昊穹佑下民酌斗杓和沆瀣揄長蛾  
擁幼艾日馳精月揚光爛昭樂未央崑崙墟瀛海滋  
以余歸浩無際

五神

維五神五岳精德盛大包羣靈佐東皇替太乙報圭璋  
達琮璧奠桂醑以椒漿拵肥腩祓斯皇女巫進姤以麗  
迴雲旃駐霞幟神偃仰以徘徊歷明堂昇帝臺維光華  
嘏大漢年歲登永嘉薦

朝隴首

朝隴首遊白麟顯光華

字說麋之來也光華不可正視從鹿從文

輔一人靈

昭昭慶萬國肇皇仁祇帝德八蠻共四夷王母息荒納

嘉祥嬉余藪服余輅浴和風沐甘露左蒼龍右紫鸞文  
狸後赤豹前圖爾形輯爾瑞五千歷視茲歲

象載瑜

象載瑜祭六牙至萬里自流沙入天閑服輿阜扈法駕  
彰大造翩翩哉赤鴻來超虞羅翔玉臺翮五文麗以鮮  
銜靈芝嚙醴泉兆嘉祥禔景福八荒來四夷服

赤蛟

赤蛟下蒼龍遊靈已醉不可留赤蛟翔彩虹馭靈欲歸

不可駐靈之逝觀玉臺戲閬風宴蓬萊靈之昇上無極  
挾宇宙傍日月靈般般亦享余下神雀降天廚靈殷殷  
肆余佑億萬祀永以壽

蒲梢歌

天馬來兮涉玉門服天閑兮朝至尊駕余車兮上崑崙  
閱萬國兮超乾坤

太乙歌

貢驂騮兮自太乙若滅没兮亡其一以龍為駒麟為匹

歷塊萬里昭帝德

靈芝歌

孕三秀兮毓靈芽承月精兮映日華爛輝光兮發雲霞  
服紫莖兮嚙胡麻乘赤霄兮上無涯

琴操十一首

龜山操

龜之峻嶒兮望魯之疆龜之憑陵兮蔽魯之邦遲遲余  
行兮載贄於筐余懷以怍怍兮胡為去父母之鄉

猗蘭操

汎汎崇蘭在彼空谷以芬以芳達於平陸達於平陸大國之香薄言掇之以遺明王以遺明王疇適逢世歲月行暮芬芳將逝芬芳爰逝羌不可留忡忡我心曷維其憂

履霜操

嗟嗟皇考放余於野兮凜凜嚴霜雨雪交下兮雨雪交下夏弗可留兮念欲自明我維君憂兮我維君憂逝將

安適兮世豈有茲無父之域兮無父之域余曷以居兮  
筑筑上天罪實在予兮

殘形操

夢之憧憧兮厥形維狸形之蛩蛩兮胡首則遺茫茫吉  
凶兮疇尅我期皇皇昊穹兮庸豁我疑

雉朝飛

雉雉於田兮維雌則隨暮而無妃兮入而安歸憂心悵  
悵兮將以告誰援琴而歌兮以寫我悲

采芝操

煌煌紫芝三秀五莖鬱鬱崇岡龍從眇冥爰卧其巔爰  
掇其英顏色麗鮮以敷以榮身輕翼舒遊六合外駟馬  
高蓋翳以疇賴巢哉由哉寤言弗猜唐哉虞哉亦已焉  
哉

秦女操

穀之稽稽兮可裂而朽兮屏之巖巖兮可越而走兮劍  
之峩峩兮可捍七首兮

八公操

煌煌八公下帝庭兮貽我大藥登遐齡兮嬰兒姪女相  
和鳴兮飛翔九垓羽翼成兮金支翠旂夾路迎兮萬年  
不死居曾城兮俯視六合徒營營兮朝生夕枯如螻螟  
兮

思歸引

維鹿有由兮維鳩有仇兮爾徒余囚余寧爾留兮

別鶴操

羽翼雙飛兮中道當乖汝翔安適兮余居曷諧彼忒則  
害兮為家庭灾汝淑則慧兮曷明余懷

牝晨操

維牝無晨兮爾胡以鳴兮維爾之鳴兮家胡以寧兮牝  
兮鳴兮鳴兮晨兮家兮庭兮忤兮營兮雷兮霆兮

少室山房集卷三

欽定四庫全書

少室山房集卷四

明 胡應麟 撰

樂府二十五首

王子喬

王子喬玉笙霞珮長飄颻王子喬玉笙霞珮長飄颻下  
遊來王子喬緱山萬桃花白日行道遙倏上浮雲騰  
身還九霄足躡一雙鳧虛空以遊遨顧視世間人勿復

勞相招蓬萊之水清且淺金銀樓殿一何峩峩三神之  
山連巨鰲仙聖億萬計駭鷲跨鳳紛紛而來朝蒼龍為  
我車烏鵲為我橋道逢王方平拍手彈雲璈麻姑十八  
九紅顏髮垂腰要我擘麟脯進藥長生瓢顧視世間人  
勿復勞相招今上神聖海晏河清曷不跨雙鳧來覲漢  
家朝凝圖奉籙壽與天迢迢下游來王子喬

桂之樹

桂之樹桂之樹輪囷偃蹇寂寞山之阿山阿者誰被薜

荔帶女蘿淹留桂樹枝以婆娑以婆娑歲月冉冉而蹉  
跎攀援桂樹枝行且歌瞻彼桐栢之山桂樹叢生其上  
高嵯峨高嵯峨吾欲采其實陰其葉憩其柯白日將暮  
熊羆虎狼夾路當奈何白日將暮熊羆虎狼夾路當柰  
何

猛虎行

南山有猛虎白額斑斕而錦文南山有猛虎白額斑斕  
而錦文目睛鑠雷電齒牙決浮雲出入乘風颭威加百

獸熊羆豺狼狐兔惕息莫敢與共羣

一解 山頭絕樵采

山底無四鄰終朝攫取行旅食黎氓婦女小兒骨骸若

丘山腥穢不忍聞

二解

謂虎汝胡不仁胡不學彼騶虞

鳳與麟百獸有恒食胡汝好食人汝胡太不仁吾將上

訴汝訴汝司命君

三解

嗾司命君不汝罪傅汝角張汝

翼礪汝爪距鋒以銳俾汝飛而食食人萬里外

四解 食

人以足天道好還忽遇洛陽三河少年賁戎發機卞莊  
奮拳伙飛鼓刃裴旻控弦擊鼓鳴鉦張網樹旗有角曷

抵有翼曷飛割裂其肉寢處其皮以首承溺為百獸嗤  
永戒後人為惡勿長為善勿疑彼不余信請視此詩

烏生八九子

峩峩秦氏高樓桂樹輪囷出雲間上有一雙頭白烏毛  
羽何摧殘喙彼頭白烏生八九子養雛坐樹端八九子  
乳哺亦誠難朝不得食夜不得餐八九子羽翼以長成  
各各飛去忘來還喙彼頭白烏空腹坐樹端饑餓頓欲  
死淚下如流泉喙彼秦氏少年子怒激壯士肝白玉為

琯弓黃金為彈丸一發中羣雛魂魄飛上天八九子魂  
魄飛上天惜彼鳥不反哺誰當憐

西門行

綦隆世化日舒玉尊肴醴羅前除東隣子燕趙姝清歌  
妙舞揚羅襦賢豪過駟馬車良辰日吉心相娛人命無  
百年日月同斯須胡為自約束悵悵常獨居豈無仙人  
王子喬駕六飛龍遊太虛豈無仙人王子喬駕六飛龍  
遊太虛天地會有終千秋萬歲後仙聖同凡愚不如命

我友撞鐘搥鼓鳴笙竽

東門行

出東門步且吁時世混濁難共居我欲乘長風東遊扶  
桑西瑤池揮首向容成億萬不相疑歸來告妻子牽衣  
蹬足長歔歔長歔歔上有垂白親下有黃口兒孔雀東  
南飛十步五步不相離君今獨行安所之君今獨行安  
所之不如守窮巷雞鳴狗吠相因依不見伯夷叔齊采  
西山蕨薇榮名被百世難等夷

順東西門行

歲行暮時既昏設我肴醴開玉尊樂親故延嘉賓軒車  
雜沓徒在門列五鼎羅八珍甘嘉溢口呈芳新飲麻姑  
招洛神擘紅虬脯羞黃麟琴瑟和鐘鼓陳檮楠六博何  
續紛長袂掩羞蛾顰纖歌隨風飄青雲良夜半星河傾  
主人未醉客尚醒二難具五福并億千萬歲延遐齡

燕歌行

嚴霜蕭蕭白露溥三星在房月在天空閨思婦愁城南

起看北斗何闌干樓頭旅鴈鳴飛翰口銜尺書下雲端  
同心為結緘瑤函下有相憶上加餐何以寄情雙玉環  
念欲報之青琅玕山高水長浩漫漫我欲從之途路難  
羅帷倚燈曙不眠秋風颯颯吹重闕安得送我置汝前

平陵東

平陵東氣鬱葱大雷電天以風啓金滕告元功誰其輔  
者安漢公安漢公坐明堂發天兵下咸陽討賊盜捕亂  
亡賊盜亂亡疇則使東郡太守翟氏子不量其力罔畏

死天兵桓桓孰敢當所擊者破禦者歿烟塵掃蕩清一  
方頸係諸纍俘未央君不見翟義公今日繫安漢公明  
日帝彼已之子甘若薺天鳳改元易漢制白水真人從  
東來昆陽百萬成沙灰坐倚斗柄臨高臺胡不再開金  
滕諭九垓胡不再開金滕諭九垓

鞠歌行

攜玉女邀僊童天門誅蕩開九重揖金母拜木公躡躡  
鹿盧乘罡風飛廉導屏翳從周遊八極騎茆龍乘元化

入無終千秋萬億齊喬松

上留田 用本調

噫嘻人世大難 上留田 貴賤貧富相懸 上留田 富貴阡

陌綿延 上留田 貧賤家無一塵 上留田 四體衣襦不完

上留田 毛翮凋疎摧殘 上留田 氣息慊慊自憐 上留田

赴訴司命君前 上留田 我獨胡為蹇連 上留田 夙生期

運致然 上留田 飲泣吞聲何言 上留田

董逃行 用本事

東京城郭煌煌

董逃

冠蓋羅列成行

董逃

天禍漢國衍

徨

董逃

白晝兵戈奪攘

董逃

劫制天子侯王

董逃

千乘

萬騎北邙

董逃

焚燒廩庾餓糧

董逃

郿塢黃金作牆

董逃

逃

天道好還有常

董逃

司徒祓除不祥

董逃

首惡剗胸

裂腸

董逃

膏血燃燈道傍

董逃

百代箴規莫忘

董逃

永

戒貪饕陸梁

董逃

悲歌

巫山之高淮水湯湯我欲東歸洛大河無梁船道阻絕

登高以望故鄉故鄉不可見  
熊羆虎狼夾路而成行  
狐兔失羣我與為侶日暮途遠  
傍無旅舍悒鬱誰語悲風  
動地陰雲四起仰天悲歌  
泪墮不能止

前緩聲歌

緣木求魚譬彼入山采珠  
意氣雖勤奈此道路殊  
總角相親同室共居  
君心有他如隔里閭  
身非草木根株他人  
有心忖度在余欲見子  
都乃值狂且嗟他心之人  
蟲鳥之弗如

蛺蝶行

飛來雙蛺蝶羽翅一何翩翩掠春風而遊東園彼姝者  
子朱為顏年十四五被髮齊兩肩忽來覩此雙蛺蝶心  
中以慘然春風浩浩歲月行蹉跎我欲捉蝶以娑娑蝶  
以雙飛奈蝶何

滿歌行

感事作  
用本調

嗟人世榮榮若過隙駒百憂填中當復誰與娛憶我年  
少時慈親大憫惜中遭荼毒展轉愁悶歲以為日家室

荆榛牝雞奪晨暉此悍虐伶俜莫可告人彼婦之惡為  
鬼為蜮潛行昏黑無從方物彼婦之惡為虺為蛇造作  
語言鼓吻搖牙慈親積戾奄忽棄背黃口嗷嗷輦埋山  
椒箠笞炮烙兇威灼鑠姬妾徬徨進退錯愕猶復蚤夜  
思維圖覆厥宗仰面叩天無地自容密計深謀猥不可  
近風波起咫尺白晝為陷穽而家弗殃彼念弗忘而家  
弗禍彼業弗墮吞聲飲泣以訴司命君彼司命之君杳  
若弗聞悍婦持門戶胡以事嚴親嚴親七十餘風燭暮

逡巡安能舍之遠去去適滄海濱憂來起中夜攬衣不  
及晨皇靈會動變沴氣干天閭大雷電風雨永戒後世  
人

兩頭纖纖詩二首

兩頭纖纖少媚眉半白半黑枰中棋逼逼膊膊倉鼠馳  
磊磊落落道傍梨

兩頭纖纖麋鹿角半白半黑檐前鵲逼逼膊膊林鴉啄  
磊磊落落荆山璞

五雜組詩二首

五雜組中天霞往復還  
貫月杳不獲已遇龍蛇

古云歲在龍蛇

賢人嗟

五雜組芝為蓋往復還  
咸陽塞不獲已見襜襜

公無渡河三首

公無渡河大河揚波長  
鯨如山鬚鬣峩峩

公無渡河一葦奈何河  
水萬丈出沒蛟鼉

公無渡河讒言孔多不  
見申屠負石投河

枯魚過河泣二首

枯魚過河泣宛轉沙泥側  
神龍處九淵螻蟻安能測  
枯魚過河泣定作盤中腊  
願覓斗升水為君赴溟渤

少室山房集卷四

欽定四庫全書

集部

少室山房集卷

五至  
十二

詳校官編修臣翟 槐

侍讀臣孫球覆勘

總校官庶吉士臣何思鈞

校對官中書臣王鍾泰

謄錄舉人臣劉 禮

謄錄監生臣閻學朱

欽定四庫全書

少室山房集卷五

明 胡應麟 撰

樂府三十首

短歌行

五解

日吉時良嘉賓滿堂星河在天蟋蟀在房

一解

懼娛易終白髮苦蚤金蠱玉尊長夜傾倒

二解

舞袖紛紜蘭膏載焚衛女齊姜左右如雲

三解

有美一人稚齒倩盼攜手同車光華粲粲

四解

翩若游龍遨嬉八埏蕩意平心永宅大年

五解

善哉行

七解

來日大難腸乾體疲今日不樂歲月如馳

一解

訪我親知總角燕好踰陌度阡以贈芳草

二解

何以延賓清酒百壺何以銷憂五木樛蒺

三解

美人滿堂巧笑便辟更長燭明今夕何夕

四解

南箕在楹北斗在簷星河陸離肴醴汎瀾

五解

忽逢安期餽我靈藥主客再拜洗盞酬酢

六解

共餌大還身輕翼舒乘雲御龍遊戲六虛

七解

日出東南隅行

日出東南隅照我陌上桑  
峩峩秦氏樓佳麗鬱相望  
飛甍百餘尺高棟五丈強  
琉璃為門限桂樹為中堂  
窈窕樓中女容華世無雙  
提籃向朝日採桑大道傍  
腰懸瓊瑜珮耳綴珊瑚璫  
首戴金雀釵足躡雙鳳凰  
吳絲作中襦蜀錦充下裳  
紫綺緣領巾綠羅隨風揚  
借問汝何名

羅敷秦女郎借問汝何居第宅連明光問汝適何人家  
令殿中郎問汝年幾何十五正相當行者觀羅敷五步  
一徬徨居者觀羅敷耒耜相扶將趙王暮登臺挾瑟奏  
笙簧侍從數百人冠蓋何煌煌舉頭見羅敷顧盼自生  
光遣吏前致辭可得充后房昔為千乘妻辛苦行採桑  
今為萬乘后芻豢同匡牀羅敷仰頭答君侯一何狂國  
主位雖尊二八盈高堂家令位雖卑糟糠亦難忘尊卑  
各有分貴賤各有雙君非秦王子妾非邯鄲倡

名都篇

三河聚年少五都盛材雄傾背灞上水結客咸陽東呼  
鷹過長樂走馬遊新豐左橐插楛矢右箛彎良弓控弦  
疾流星鳴鏑如追風穿楊競百步蹲甲洞七重仰面落  
九鳥俯身拾雙鴻萬夫為辟易觀者盈道中日暮還城  
郭華筵撞笙鏞屏間擁稚齒坐右羅妖童烹鮮割翠縷  
椎牛炙黃熊酣歌酌太白慷慨噓長虹呼盧列明燭良  
夜未及終酒闌拔劍去斜月猶朧朧

美女篇

長安出佳麗宛洛多名姝遊戲芳春日踏青歧路隅銀  
環約素手玉珮飄華裾丹霞錯綺袖惠風揚羅襦懸腰  
燦火齊充耳大秦珠珊瑚間四體寶釵直萬餘揚音若  
蕙蘭吹氣勝芙蓉吳姬亮非偶衛女焉得如衆觀共嘆  
息日暮羅長衢居者為忘飡行者各踟躕何來少年輩  
三五乘驪駒傾城覩明豔蕩思欲忘軀豈無千金聘諧  
此百歲娛疇為伯鸞匹偃蹇寧獨居寄聲俠遊子相望

徒區區

白馬篇

白馬誰家子揚鞭大道傍銀鞍耀明月寶劍如秋霜十  
五隸金吾二十拜龍驤百千聚遊俠百萬要名娼鬪雞  
入南內挾彈遊平康京兆不敢呵司隸為彷徨征塵際  
天起邊烽達長楊長揖大將軍慷慨事戎行橫行絕大  
漠虎嘯臨窮荒矯詔襲樓蘭飛書定朔方左射中休屠  
右盼伏中行兵威懾絕塞奏凱向咸陽獻俘詣平樂賜

第連明光歸來顧少婦挾瑟宴華堂

升天行

九州非我宅五岳不足居乘蹻躡浮雲周覽萬里餘朝  
遊崑崙頂夕息瀛海隅舉頭見三山城闕正逶紆圓嶠  
聳巨鰲方壺戴神魚西行謁王母置酒行天廚靈妃酌  
金液玉女吹笙竽燕樂未及終飛騰起太虛駝龍叩玉  
闕駕鳳翔靈旗長揖問軒轅俯身拾帝車明霞為我珮  
素霓為我裾飄飄謝塵世萬歲同斯須

仙人篇

我思忽不懌投袂起行遊擔簦躡芒履去上嵩山丘王  
屋一何高太行亦阻脩危峰冠浮雲巨石橫道周青松  
數十圍枝葉自相樛上有千歲禽下有萬尺流矯矯浮  
丘公吹笙跨靈虬投我不死藥攜我升蓬丘丹霞起素  
壁紫霧開瓊樓橫飛絕四海高舉臨九州顧視世間人  
局促安可留朝生等舜華夕死同蜉蝣

相逢行

相逢狹路間騎從一何都借問來者誰中尉執金吾銀  
鞍耀白日寶劍珮昆吾英聲走劇孟勇氣凌灌夫西征  
破大宛北顧推匈奴去年出湟中一戰定邊隅歸來報  
天子賜第連皇都黃金為門限白玉中堂鋪堂上何所  
有七尺紅珊瑚十千治晨殮百萬當呼盧樂工高漸離  
蒼頭馮子都長婦字莫愁中婦名羅敷少婦何名字顧  
盼日當爐弟兄八九人各各列當塗炙手勢可熱聲焰  
絕代無行人但引避無事勞追呼

門有車馬客行

門有車馬客意氣何揚揚千金飾玉鞭百金寶劍裝傳  
呼動里閭顧盼自生光長婦出迎客問客來何方客言  
自幽薊乍者發漁陽道逢遠征人寄書來故鄉開緘竟  
何道細書八九行昔為絲與桐今為參與商參商各異  
地羽翼安得雙長跪再拜客邀客暫徜徉烹庖出豐膳  
高宴羅酒漿願為傳語懽努力莫相忘

遠遊篇

端居厭塵世飛步凌大荒左挾青龍馳右駭赤豹翔西  
遊翳若木東望窮扶桑竦身崑崙顛息駕玄圃傍道逢  
安期生托手共徜徉攜我黃金臺坐我白玉牀太虛為  
我宅沆瀣為我漿俯仰竟百世焉能辨彭殤

結客少年場行

長安富遊俠騎射出名都飛揚結壯士慷慨聚屠沽百  
千市駿馬十千裝轆轤朝遊上林苑暮宿賣酒盧赤丸  
報司隸白刃戕金吾笑傲金張第叱咤許史途盛年諒

難再壯志不可孤鳴弓向張掖插羽飛平盧左發摧馬  
者石發中休屠死當畫麒麟生當雄萬夫

筮篋引

良時率已邁蟋蟀鳴我牀眷言召親友旨酒羅中堂東  
鄰飾妖女南陌招名娼綃衣隨風舉羅襪自飄揚秦聲  
被金石楚曲流宮商清談蔚霞爛妙舞若雲翔頽陽條  
西落明月出東方飛軒歷層囿改席臨洞房華燈吐芳  
焰列宿澄清光齊心懷令德四坐咸盡觴芳辰諒難再

嘉會詎可常人命一朝盡奄速如秋霜樂哉今日宴百  
歲遙相望

從軍行

邊塵起西北敵騎日相望仗劍報明主長揖辭故鄉征  
行渡沙漠慷慨隸戎行羽書昨夜至匈奴寇漁陽吏士  
若雲屯我兵精且強揚旌耀漢月吹角飛邊霜一戰摧  
月支再戰欵名王彎弓月在手鳴鏑星流光勒功燕然  
石傳檄瀚海傍歸來拜驃騎恩寵冠長楊

置酒篇

端居觀大運去日常苦多幸有盈尊酒賓朋各來過佳  
人出後房被服綺與羅纖腰鬪妙舞皓齒揚清歌輕飈  
蕩浮雲華星爛明河好鳥鳴高枝文魚翔素波百年若  
朝露白日馳山阿樂哉今日宴不飲復如何

君子行

嗚呼大聖人世或見疑猜周公被流言仲尼困桓魋賢  
材實累身忠信為禍媒蒼蠅點白璧蚊蚋噓風雷麒麟

匿郊數朱鳳成推頽仰天再嘆息沈憂熱中懷擾擾蝸  
角爭忉怛勞形骸千秋萬世後愚智同塵埃

豫章行

騰蛇自有翼未若應龍潛蛟屈重淵中潤澤被八埏宣  
尼浴沂水武仲巢箕山於陵餓仲子通國稱其廉

孤兒行

步出北郭門荆榛夾路齊悲風起白楊葉落何淒淒道  
逢孤兒卧肌膚若蝟蟻伶俜瘦皮骨却立忘東西對我

但長跪氣咽不能啼自陳無罪過父惑後娶妻夙昔干  
金愛慈母嬌提攜高堂脩背棄妖牝鳴晨雞風波起骨  
肉咫尺如秦齊終朝拾橡粟薄暮食黃塵篲笞動盈百  
卒歲無領締棄置田野間冉冉白日低昔為掌上珍今  
為濁水泥千秋履霜轍永永戒前蹊

白頭吟

結禱奉明德精誠決浮雲死生誓同穴富貴安足論一  
朝事勢異緬邈若越秦風波起對面讒慝來相仍盛衰

捷反掌愛憎一何頻昔者寒爐火今為甌下塵還君錦  
繡段著我苧羅裙念彼求凰曲恨恨不能陳

鬪雞曲

翩翩五陵少挾彈遊咸陽萬錢飲俠客千鎰招名娼走  
馬東郊外鬪雞大道傍兩雄昂然出五色麗且光黃金  
介白羽綠沈鑄玄裳雙眸炯相射四距翼而張憑陵壯  
夫膽激烈猛士腸俱呈慶忌捷競逞黑卯剛犖牙攫豹  
虎怒臂撐螳螂先聲驟恫喝後舉劇披猖朱冠碎鞞鞞

彩頰掀琳瑯寧論北宮撓肯避平陽創迴身角伎巧聳  
翻馳精芒初交氣方盛再合勢彌強捐生赴仇國效命  
臨戰場縱橫掣驚電跣跋挈秋霜摧鋒若禦寇逐北如  
擒王干旄助踴躍鉦鼓隨騰驤天地黯無色塵沙劇飛  
揚懽呼壓塵市登眺摧山岡中原逐秦鹿大陸虺天狼  
雄雌久未決轉戰益慨慷遲遲白日墮兩敵為彷徨安  
得魯陽刀一揮返扶桑

三婦豔二首

大婦拂花箋中婦理冰絃小婦學彈棋天桃鬪春妍良  
人定晴覩誰當最可憐

大婦貼花鈿中婦理紅粧小婦畫蛾眉含嬌踏春陽良  
人試垂盼良夜殊未央

廣三婦豔四首

大婦出姬姜族望不可加中婦出燕趙容色鮮如花小  
婦出吳越盈盈嬌浣紗丈人但安坐四海方為家

大婦字若蘭深閨理流黃中婦字羅敷陌上行采桑小

婦字莫愁盈盈居畫堂  
丈人但安坐滿目饒春光

大婦出迎客二十頗有餘  
中婦起持觴二九曳羅襦  
小婦坐鳴箏二八正敷腴  
丈人但行樂南面安得如

大婦年十九高堂坐擣菡  
中婦方十七明瓊角呼盧  
小婦正十五青春獨當壚  
丈人但行樂何羨執金吾

續三婦豔二首

大婦處華堂玉貌錦衣裳  
中婦處高樓玉指撥箏篴  
小婦處金屋玉簪髻初束  
白日懽未足良夜更秉燭

大婦粧初成一顧傾人城中婦粧乍畢一盼傾人國少  
婦粧未已一笑傾人主有酒清且旨交加學連理

反三婦豔二首

大婦吟白頭溝水東西流中婦歌懊儂紅顏空自紅小  
婦咏團扇辛苦郎自見莫誇三婦豔丈人涕如霰

大婦氣食牛千喚不回頭中婦愁緒縈敢怒不敢嗔小  
婦訴卑賤終朝淚洗面莫誇三婦豔丈人腸欲斷

少室山房集卷五